

# Dictame sobro criterios de preferencia ente materies optatives y la de “Llingua Asturiana y Lliteratura” nel Bachilleratu

Emitíu a pidíu de les profesores de Llingua asturiana y lliteratura del IES Asturias de  
Llugones, Beatriz Fernández Cuesta y Monserrat García Fueyo

§

Xurde Blanco Puente  
Aconceyamientu de Xuristes pol Asturianu

Uviéu 2010

:: axa ::

stvdium ivris § tvtela lingvae § forvm ivstitiæ



Copyright – Dellos derechos reservaos  
Aconceyamientu de Xuristes pol Asturianu, 2010

Esta obra acuéyense a una llicencia de **Creative Commons**  
Esti material puede esparde y copiase respetando la cita la fonte orixinal y l'autoría. Nun se va poder sacar beneficiu comercial dalu d'elli y les posibles obres derivaes que se fagan, habrán tar baxo los mesmos términos de llicencia que'l trabayu orixinal

## 1. EL PROBLEMA PLANTEGÁU.

L'artículu 9 del Decretu 75/2008, de 5 d'agostu, pol que s'aprueba'l currículu de Bachilleratu nel Principáu d'Asturies, desarrolláu per Resolución de 4 de marzu de 2009, de la Consejería d'Educación y Ciencia, establez un mínimu de cinco asignatures optatives que puen ser delles más acordies colo que caún de los centros determine al respetu. Nos mentaos Decretu y Resolución, a la materia de "Llingua asturiana y lliteratura" dase-y la condición d'optativa.

Al facer la matrícula, los alumnos tienen qu'escoyer la materia o materies optatives que-yos preste poniendo nel impresu más d'una y per orde de preferencia y, acordies con ello, el centru determinar que optatives van dase y cuáles non tomando en cuenta los criterios seleutivos darréu, conteníos nel artículu 8 de la mentada Resolución de 4 de marzu de 2009:

a) Algamar grupos d'ocho alumnos nel conxuntu de tol cursu (primeru o segundu de Bachilleratu), seya cual fore la estremada modalidá siguida polos alumnos, pa les materies de Llingua y lliteratura asturiana I y II, Segunda llingua estranxera I y II y Teunoloxíes de la Información y la Comunicación.

b) Algamar grupos d'ocho alumnos, dientro de caúna de les modalidaes del Bachilleratu, pa les optatives Proyeutu d'investigación integráu y de la modalidá escoyida como optativa pol centru, y n'entrambos los dos casos, "siempres que se pretenda constituyir como grupu independiente de la materia de modalidá propiamente dicha".

c) Pa les demás optatives desíxense grupos mínimos de 15 estudiantes.

d) Esceicionalmente pue rebaxase'l númberu mínimu d'escolinos necesarios pa perfacer grupu d'optativa.

El problema pue xurdir cuando hai pidimientu de delles optatives que cumplen col requisitu de númberu (ordinariu o esceicional) establecíu y nun puen impartise toes por mor de que l'artículu 8.c) de la Resolución de de 4 de marzu de 2009 llenda'l númberu de grupos d'asignatures optatives al del los grupos ordinarios multiplicáu per coeficiente 1,5 .

¿Qué criteriu seleutivu tien d'acoyer el centru pal casu de que'l númberu de grupos d'asignatures optatives posible pase de la cifra máxima llegalmente permitida?. ¿Qué principiu eliminatoriu tien de seguir?.

Énte esta hipótesis, el claustro de profesores del IES Asturias de Llugones plantégase esta alternativa:

1ª opción: dar preferencia a los grupos qu'esqueyan cualquier optativa valoratible nes pruebes d'accesu a la universidá o esixida pa poder seguir otros estudios superiores.

2ª opción: dar preferencia acordies al númberu d'alumnos de los grupos.

## **2. FUNDAMENTOS DE DRECHU.**

### **2.1. LA PRIMERA DE LES OPCIONES PLANTEGADA NUN TIEN SOFITU LLEGAL DALU.**

L'artículu 9.4 del Decretu 75/2008, percitáu, establez como únicu criteriu seleutive'l numéricu. Poro, la pretensión de dellos profesores d'imponer un criteriu cualitativu – más o menos atrautivu pero ayenu dafechu a la llegalidá- nun ye de recibu porque nun se pue sustiyir la voluntá llegal pela d'un garapiellu más o menos grande de ciudadanos obligaos a cumplir la norma. Arriendes dello tala propuesta fai una mecigaya coles tres estremaes modalidaes d'asignatures optatives (descrites nos lliterales a, b y c del separtáu 1 d'esti informe) lo que tamién va a la escontra dafechu del mandáu llegal.

Ello quier dicir que namás pue emplegase'l criteriu numéricu na seleición d'asignatures optatives.

### **2.2. SOBRO LA CONDICIÓN LLEGAL EXTRAORDINARIA DE L'ASIGNATURA DE LLINGUA ASTURIANA.**

D'otra miente, l'asignatura de llingua asturiana nun tien la simple condición de materia optativa en sentíu estrictu. Ciertu que nun ye obligatoria, porque asina lo determina l'artículu 10.1 de la Llei 1/1998, de 23 de marzu, d'usu y promoción del bable/asturianu ("respetando la voluntariedá del so deprendimientu") y nesi sen, gramatical (optar: decidise por daqué que s'escueye ente delles posibilidaes), bien pue dicise que ye optativa. Pero namás neso coincide la materia de llingua asturiana coles otres optatives recoyíes nel artículu 9 del Decretu 75/2008, porque nes demás carauterístiques consustanciales a les materies optatives comunes, la de llingua asturiana nun participa.

Asina, a la materia de Llingua asturiana nun pue imponese-y restricciones por mor del númberu d'alumnos que la escueyan, porque pa ella nun cunten les disposiciones reglamentaries al respetu (artículos 9.4 del Decretu 75/2008 y 8 de la Resolución de 4 de marzu de 2009, de la Consejería d'Educación y Ciencia) porque la desixencia de grupu mínimu pa impartila ye contraria a lo dimpuestu nuna norma con rangu superior, l'artículu 10.1 de la Llei 1/1998, que nun pon llende dala, nin numérica nin d'otra frasca, a la obligación de "garantizar l'enseñu del bable/asturianu en tolos niveles y graos", siendo asina qu'onde la llei nun discrimina nun pue facelo nin el reglamentu, nin l'autoridá educativa que lu dicta, nin los tribunales de xusticia, aminorgando asina l'exerciciu d'un drechu, nesti casu'l de los escolinos a deprender la so llingua llariega, reconocíu, non solo na Llei Autonómica sinón, y nada menos, nun tratáu internacional ratificáu por España -máxima espresión llexislativa acordies col artículu 96 de la Constitución española- como ye la Carta Europea de les Llingües Rexonales o Minoritaries, artículos 7.1.f) y 10.

Tampoco comparte l'asignatura de llingua asturiana, con les optatives que venimos denominando del común, la condición de materies esfronaes pente so, nel intre d'escoyer unes y escartiar otres, porque pa los estudiantes que escueyen la materia de llingua

asturiana "el so deprendimientu nun podrá torgar que reciban la mesma formación y conocimientos n'igualdá de condiciones que'l restu del alumnáu" (artículo 10.3 de la Llei 1/1998), lo que-y quita a l'asignatura de llingua asturiana la condición de competitiva con otres materies optatives (la escoyeta d'una elimina la posibilidá d'otra) que sí tienen toles demás.

### 3. CONCLUSIONES.

1ª. Talu qu'establez l'artículo 10 de la Llei 1/1998, l'Alministración del Principáu d'Asturies tien de garantizar la materia de llingua asturiana a tolos estudiantes que voluntariamente la soliciten ensin qu'ello signifique torga dala pa recibir la mesma formación y conocimientos que'l restu l'alumnáu, n'igualdá de condiciones.

2ª. Les disposiciones relatives a grupos mínimos en materies optatives y seleición de los mesmos nel so casu, establecíos nel Decretu 75/2008 y na Resolución de 4 de marzu de 2009 de la Consejería d'Educación, tienen d'aplicase dende'l respetu dafechu a lo estableció nel artículo 10 de la Llei 1/1998.

3ª. Si se incumpliere el requisitu anterior, aplicándo-y a las materia de llingua asturiana les mesmes llendes de númberu mínimu d'alumnos y de competencia, propies de les asignatures optatives comunes, conculcaríase'l principiu de xerarquía normativa proclamáu nel artículo 9.3 de la Constitución y desarrolláu pelos artículos 51 y 62 de la Llei 30/1992, de 26 de payares, de Réxime Xurídico de les Alministraciones Públiques y del Procedimientu Alministrativo Común, el primeru declarándolu y el segundu condergando a la nulidá de plenu drechu a los actos que nun lu respeten.

Llegáu esti casu les persones llexítimaes (estudiantes o representantes llegalos de los mesmos, si son menores d'edá; profesores de llingua asturiana; y sindicatos de la enseñanza, pente otres persones xurídiques posibles) podríen interponer recursu d'alzada, énte'l Conseyeru d'Educación y Ciencia, escontra l'actu del IES, nel plazu d'un mes dende que se notificó, y escontra lo qu'esti resuelva demanda énte'l Tribunal Superior de Xusticia d'Asturies, nel plazu de dos meses

El presente dictame fízolu gratuitamente l'Aconceyamientu de Xuristes pol Asturianu a pidíu de les profesores de Llingua asturiana y lliteratura del IES Asturias de Llugones, Beatriz Fernández Cuesta y Monserrat García Fueyo, roblándolu Xurde Blanco Puente ponente del mesmu.